

Turissems da qualidad ed examen da chatscha

■ (cc) La regenza grischuna ha decidì da cuntinuar cun il program da qualidad dal Grischun per il turissem. Plinavant ha ella concludì ina scolaziun obligatorica d'armas e da tir sco nova premessa per l'admissiun a l'examen da qualificaziun per la chatscha.

Cuntinuaziun dal program da qualidad per il turissem

Il program da qualidad dal Grischun per il turissem, ch'è vegnì lantschà la fin da l'onn 2011, vegn cuntinuà. Per la fasa da realisaziun 2014 e 2015 ha la regenza approvà ina summa maximala d'in mez milliun francs (mintgamai per la mesadad a quint da la confederaziun e dal chantun sco project da la nova politica regiunala). Resalvada resta la concessiun dals credits necessaris tras il cussegl grond. Il program gida ils acturs turistics en il chantun a meglierar la qualidad per il giast. Realisads vegnan projects da pilot, per exempel en il sector da la qualidad da l'ambient, che pon avair in effect d'imitaziun en auters lieus dal chantun. Grazia al program po er la qualidad da las aventuras e dals servetschs vegnir meglierada en las destinaziuns turisticas. Controllas secretas (uschenumnads «mystery checks») en las destinaziuns inditgeschan la cuntentientscha dal giast e mussan largias en la chadaina da purschidas turisticas. Il program vegn realisà tras la direcziun da project externa d'enfin ussa. Infurmaziuns impurtantas stattan a disposiziun en furma concisa sin www.qualitaet-gr.ch.

Scolaziun obligatorica d'armas tar l'examen da chatscha

Per pudair far l'examen da qualificaziun per la chatscha grischuna vegn premessa a partir da l'onn 2014 er ina scolaziun obligatorica d'armas e da tir. La regenza ha adattà l'ordinaziun chantunala davart ils examens da chatscha tenor ina incumbensa ch'il cussegl grond aveva acceptà en la sessiun d'avrigl 2013. La revisiun parziala entra en vigur il 1. da december 2013.

La scolaziun d'armas e da tir cumpiglia 25 uras. L'uffizi da chatscha e pestga fixescha tge pretensiuns ch'ils purschiders dals curs ston ademplir e designescha quels. Ultra da l'Uniun grischuna da chatschadras e da chatschaders da patenta, che porscha gia oz in curs da teoria da las armas e da tir, pon ils curs er vegnir offrìs da varts privatas, en spezial da possessuras e possessurs da fatschentas d'armas. Mo tgi che po cumprovar d'avair fatg la scolaziun d'armas e da tir

dastga far l'examen d'armas e da tir sco part da l'examen da qualificaziun per la chatscha.

Plinavant ha la regenza adattà levamain la valitaziun da las notas. En ils traits roms centralis «selvaschina ed ambient», «enconuschientschas da la selvaschina» sco er «enconuschientschas da la chatscha e da la tgira» na dastgan las candidatas ed ils candidats da l'examen da chatscha da nov betg avair dapli ch'ina nota sut 4.



Per pudair far l'examen da qualificaziun per la chatscha grischuna vegn premessa a partir da l'onn 2014 er ina scolaziun obligatorica d'armas e da tir.